



Te Kura Kaupapa Māori o
NGĀ MOKOPUNA

4 Te Awanui o Falkirk, Maraenui
Te Whanganui-a-Tara 6022
waea: 04 380 8966

Imēra: tari@tkkmmokopuna.school.nz
Pae tukutuku: www.tkkmmokopuna.school.nz

Pūrongo Tumuaki
Hui Kaihautū / Hui Whānau

#45/2026-27
18 Huitanguru 2026

Kaupapa	Kōrero
Tīmatanga Tau Karakia Waitangi	Kātahi anō te tino tīmatanga tau ko tērā kua kitea i tēnei tau. E te whānau whānui, nau mai hoki mai ki te tau kura 2026. Ko tā tātou hui whānau tuatahi a kiko nei tēnei, ā, he nui ngā kaupapa e haere ana. Ka nui te mihi ki ngā kaikarakia tokotoru ko Paiheretia Aperahama, ko Wātene Campbell rātou ko Shanara Wallace - nā ratou ngā takutaku o te atatū i taki ki te whakaū i te mauri o Rongo mō ngā whare o tō tātou kura hou e karanga mai nei. Ka rua, nā ratou anō ngā karakia o te puaotanga i taki hei pure, hei tohi mā tātou mō te tīmatanga o te tau kura. E kore e mīmiti, e momotu ngā mihi ki a koutou kei aku rangatira. Otirā, ki a koutou te whānau i whai kaha ki te puta mai i tērā haora, kei whea mai tā koutou kaha, tā koutou maia, tā koutou tautoko i te kaupapa o Te Aho Matua! I te paunga o te wiki tuatahi ko Te Rā o Waitangi, ā, ko tātou tērā i te pāka o Waitangi e whakangahau atu ana ki te marea ki te whakanui i tērā o ngā kaupapa whakahirahira. Tēnā hoki koutou ngā whānau maha i tae a tinana atu!
Ngā Tamariki	Rite ki ngā kōrero i pānuitia i te paunga o te tau kua pahure, e 143 ngā tamariki ake kei tō tātou kura, ā, e 27 anō ngā tamariki wharekura kei tō tātou kura teina o Manawatu. Nā reira e 170 te huinga tamariki kei te rārangi ingoa. Ko te whakapae, hei te paunga o te tau nei, e 163 kei kōnei ake, tāpiri atu ko te 27 o Manawātū tonu. E 99 ngā whānau o te kura i tēnei wā. O ngā tamariki kei te kura ake e 89 kei ngā tau 0-6 (e rua tau tōmua!); e 18 ngā tamariki tau 7-8; e 22 ngā tamariki tau 9-10, e 14 ngā tamariki tau 11-13.
Kura Hou Kawe Tamariki	He nui ngā kōrero heoi, ko Holmes Construction Ltd tērā e mahi ana ta rātou mahi ki te hanga i tō tātou kura. He tino pai tā rātou whakarite i te hōro hei akomanga, ā, kei te karawhiua ngā mahi ki te hanga i ngā whare hou. He NUI ngā mahi mā tātou nā reira e te whānau, kia mau, he tono kei te haere! He take haumarutanga tēnei. Kei te piki haere te rahi o ngā taraka nui e taetae mai ana ki te hanga i tō tātou kura hou nā reira kei te panoni te wāhi whakatau me te tiki i ngā tamariki. Mai i te wiki e tū mai nei (23/02/26) me whakatau ngā tamariki katoa ki te kēti matua kei mua (te taha moana). Me tiki anō ki reira i ngā ahiahi. Ko ngā tamariki e haere ana mā runga pahi, mā runga wēne kura rānei, ka piki, ka heke ki te taha o te māra kai. Nā reira mātua mā, whakamutua te whakatau i ngā tamariki ki te kēti kei Falkirk Ave. Ngā mihi nui.
Āwha	Kua kite anō, kua rongo anō tātou te mana nui o Tāwhirimātea inā ka karawhiu mai a ia i te tonga! Ko te haumarutanga o ngā tamariki, tae atu ki ngā kaiako, ngā kaimahi anō hoki te aronga matua nā reira, ki te kati te kura, ka whai wā anō kia

	tika ngā rā tuwhera i te tau. Tēnā koutou ngā whānau mō tā koutou aroha i ēnei wā mōrearea!
Hōtaka Hauora / Waiora me te kaupapa a TRN	“Kimihia, rangahaua - kei whea koutou e ngaro nei?” He tangata, he ohu rānei e rapua ana ki te arahi i ēnei mahi ma tātou. Ko wai e whai kaha ki te manaaki i tēnei kaupapa? Tēnei me te kaupapa e whai ake nei ka haere ngātahi.
Tūranga Mahi - Tautāwhi Tamariki	Hei hoa haere ki te kaupapa o runga, kua whiwhi pūtea tātou o Ngā Mokopuna ki te whai i tētahi tangata hei āwhina i ngā tamariki matea motuhake, whakaraerae anō hoki. Nā Te Rūnanga Nui o ngā KKM o Aotearoa me Te Tari Mātauranga tēnei tahua, ka nui te mihi ki a rāua tahi! He tūranga 0.5FTTE mō te rua tau noa heoi anō, he āwhina nui tonu. E hoa mā, ki te mōhio koe ki tētahi tangata e kaingākau nui ana ki te āwhina, tautoko hoki i ngā tamariki, whakamōhio atu ki a ia ki te whakapā mai ki a au. Kei te wātea tēnei tūranga inaia tonu nei! He whakaraupapatanga mahi kua whakaritea e TRN mō te tūranga nei heoi, kei a tātou te mana ki te whakatau he aha āna tino mahi. Ka nui te mihi ki a Whaea Ella Cartwright me tana tīma o TRN - Te Ohu Tautāwhi Tamariki mō tēnei aheinga hirahira rawa atu.
Ngā rohe reo rerekē	Ko te kura he taiwhanga reo Māori e hoa mā nā reira, kia kaha koutou otirā tātou katoa, tō tātou taiao reo Māori te tiaki. Ko ngā wāhi e whakaaetia ana te kōrerotanga o te reo Pākehā ko te tari, kei waho rānei i ngā kēti heoi anō, kaua e pātata ana ki te wāhi kei reira ngā tamariki. Kei a tātou katoa te haepapa ki te whakanui i tō tātou reo. Ahakoa iti, a tēnā, whakamahia te reo kei a koe! Koutou e matatau ana ki te reo, tākohangia te reo kei a koe ki tangata kē, hei koha māna. Tēra te kōrero o Te Aho Matua e pā ana ki te hunga e ako tonu ana i te reo, “mehemea e tika ana te ngākau, a tōnā wā ka mau.”
Tahua Pūtea a Tau	Kua rite, ā, e āpiti atu nei. He whakamāramatanga anō mō te putea a tau kua whakaritea, ā, ka kōrerotia ērā ki te hui. Tuarua, he pepa anō kua whakaritea e whakamārama ana ngā hua o ngā moni kua penapenatia i te tau kua pahure.
Kākahu Kura - Wharekura	Mātua mā, i ngā wā ka mau ngā tamariki a rātou kākahu ōkawa, me ōkawa hoki ngā hū. Kāore e whakaaetia ngā momo hū hākinakina hei hū ōkawa.
E Kainamu Mai Nei	
Wānanga Waiata	Ko tētahi tira raukura e whakaaro nui ana ki te whakahaere i ētahi wānanga ako waiata mā te whānau. Tēnā rā koutou raukura mā! He whakaritenga tēnei ki te tautoko i ngā akoranga a ngā tamariki, mō te whakatūwheratanga o tō tātou kura hou anō hoki. Ka tīmata hei te marama e tū mai nei. Kāore e roa te pānui motuhake ka puta. Ka haere ēnei wānanga mō te roanga o te tau.
Paekākā Tau 0 - Tau 4 24/02/2026	Hei tērā wiki, Rātū 24/02/2026 ka haere ngā tamariki Tau 0 ki te Tau 4 ki Paekākā, (Wgtn Botanical Gardens) mō te rā. Kei te rapu kia 8-12 pea ngā mātua ki te tautoko i terā haerenga. Mehemea ko koe tērā e wātea ana, me wawe te whakamōhio atu ki a Whaea Gina rātau ko Te Marie, ko Whaea Te Ngāwari, ko Whaea Sylvia, ko Matua Lewis.
Wānanga Whakatūwhera 28/02/2026	Inā ngā mahi nui mō te whakatūwheratanga o tō tātou kura hou hei te tau e tū mai nei, he Hui Whānau Motuhake e karangatia ana hei Wānanga TAM mā tātou. Ko te whakaaro ia ka whakatūria hei te Rāapa 4 o Poutū te Rangi (Maehe) . Ka timata hei te 6pm, ka mutu hei te 8pm. Mauria mai he pereti kai. He Ohu hou kei te whakaarotia - he aha hei mahi mōu? Mauria mai e hoa hoki.

Hui a Tau TRN 26-28/03/2026 Taupō	Hei te 26-28 o Poutū te Rangi tū ai te Hui a Tau o tā tātou Rūnanga nui o ngā KKM o Aotearoa ki Taupō. Ka kati te kura i te 26 me te 27 (he Rāpare, Rāmere). Ka haere ngā kaiako katoa ki te hui heoi anō, e tūwhera ana tērā ki ngā whānau katoa e hiahia ana te haere. Mehemea ko koe tēnā, me wawe tō whakapā atu ki a Whaea Rhianon. Karekau he utu ki te haere atu.
Pōtaetanga a te Tumuaki	Kua pōwhiri mai Te Whare Wānanga o Te Kunenga ki Pūrehuroa kia whakawhiwhia e au te Tohu Hōnore Tākuta mō aku mahi i te ao mātauranga Māori. Ko te rā pōtaetanga ko te Rātū 14 o Paengawhāwhā. Ko te wiki tuarua tērā o ngā hararei kura e haere mai nei. Ka tū ki te marae o Te Rau Karamu, Pukeahu, Te Whanganui a Tara. Kei te whakaritehia tonutia heoi anō, he whakamōhio noa.
Pae Tata	
Hanga whakaaturanga	Kua kitea he rōpū ki te whakaū i ngā pikitia tawhito o te kura ki te rorohiko hei kohinga whakaaturanga kia rite mō te whakatūwheratanga. Ko Meinga tō rātou ingoa, he kohinga ākongā o mua o te kura nei (nō te whānau Te Hira). E iwa ngā whakaaturanga e whakaarotia ana. Ko Whaea Kelly Te Paa tā tātou kaitiaki mō te kaupapa nei. Me he whakaahua a koutou hei koha atu, a tēnā, whakamōhiotia a Whaea Kelly. Kei te rapu whakaāe nō ngā whānau ki te whakamahi i ngā pikitia katoa. Ki te kore tētahi whānau e whakaāe kia kitea te / ngā whakaahua o tō tamaiti, o ōu tamariki rānei ki roto i ēnei whakaaturanga, whakapā atu ki a Whaea Kelly. Kua timata ngā mahi. Hei te Hakihea kite atu ai ngā tanga hukihuki o ērā.
Counselling Services (Kaimātai Hinengaro)	Ka timata anō ngā mahi a Whaea Claire Teal hei a kua nei. He kaimātai hinengaro a ia nō Kōwhai Therapeutics. Ko te nuinga o āna mahi i te kura i tērā tau i te taha wharekura heoi, ki te pirangi tētahi whānau ki a ia mō tētahi tamaiti kura tuatahi, e taea ana. Karekau he utu ki tētahi whānau mō tēnei mahi, ko te kura ka utua. He pūtea kua tonoa mai e Te Rūnanga Nui o ngā KKM o Aotearoa mō tēnei tū momo mahi. Ki te hiahia koe kia tae tō tamaiti ki a ia, whakapā mai.
He Kōhanga Reo hou kei te paerangi	Kei te whai tonu e māua ko Matua Reece Kōhatu, te whakaaro kia whakahokia mai te mana mō 11 Ventnor St, ki te tari mātauranga hei whenua mō <u>Te Kōhanga Reo o Ngā Mokopuna.</u> E anga whakamua ana te hanganga mai o tō tātou kura, nā reira e ai ki tā tātou hunga whakahaere whanaketanga whenua (project management group TBIG) me ū tonu ki te whakareka i te tari mātauranga me te iwi ki tā tātou e manako ai!
Kia maumahara tātou!	
Tirohanga hou ki te kawenga marautanga - me ētahi atu kaupapa rangahau	Kua timata tā mātou (ngā kaiako) whai i ngā kaupapa whakapakari i ngā kawenga marautanga ki roto i tō tātou kura. E whā ngā hoa haere o tēnei kaupapa. 1 Ngā whakamāramatanga e pā ana ki ngā tino aronga i ia taumata o te kura 2 He paearu hei arahi i te pikinga matatautanga o ia tangata ki te reo Māori 3 Te whai whakaaro me te whakaū i ngā hua o te ako e ai ki Ngā Mokopuna 4 Te whakaū i te tauira me te rautaki pūrongo hou hei whakaatu atu ki ngā mātua e pēhea ana te tipu, te ako me te whanaketanga o ia tamaiti. Ka haere ngātahi ēnei kaupapa rangahau haerērē i raro i te arahi a te tumuaki.
Arotake Whaiaro	Kua roa nei tātou e whai i te punaha arotake whaiaro mō ngā take e hia nei, ā, ko te kaupapa arotake o te wā, ko tā tātou Mahere Rautaki. Taihoa kia tukuna he uiui ki a koutou katoa. Ki te tae atu terā ki a koutou, kia kaha rā ki te tuku mai i o koutou whakaaro.

	Ko ngā pātai nui: he aha ō koutou otirā ō tātou manako nui mō tō tātou kura mā ngā tamariki mokopuna i ngā kei te tata mai nei? Ki te whai whakaaro mā ngā tamariki me te toitūtanga o tā tātou kaupapa, ka pai! Ki te kōtiti atu i ērā aronga nui whakahirahira, ekene pea he raru ka hua mai a tōna nei wā. Me mauri taketake tō tātou aro kia toitū te reo, kia toitū te wairua me te mātauranga Māori, kia toitū a te aho matua!
Kura Teina	Ko TKKM o Manawatū tonu tā tātou kura teina (wharekura). E 27 ngā ākonga kei a rātou i tēnei tau, ā, e tokorua o a rātou kaiako kei tō mātou rārangi kaiako. Ko te nui o te pūtea ka tuari atu ki a rātou i te tau nei ko te \$147,305.08 Tāpiri ko te GST \$22,095.76 ko te Huinga ka \$169,400.84 E tika ana terā moni mō ngā ākonga e 27. He tumuaki kairiwhi tā rātou i tēnei wā. Kua pai ake tā rātou tuku mai i ngā pūrongo kua tonohia e tātou.
Tirohanga Whakamua	
Rā whakamutunga 11/12/2026 (15/12/26???)	I tēnei wā, ko te rā whakamutunga o te tau mō ngā tamariki ko te 11 o Hakihea. [Mehemea ka kati anō, ko te huarere te take, ka kati hei te 15 o Hakihea.] Heoi anō, ahakoa te rā, ko tā tātou mahi mō te rā whakamutunga, ko te tuku mihi ki ngā whare tawhito mō ngā mahi nui kua kawea ki roto i a rātou i ēnei tau e 25 kua pahure ake nei. He karakia, he mihi, he poroporoaki - katoa, katoa - i roto i te koanga ngākau. Ka mutu, ka kai tahi tātou. Ka kore e kitea anō i ēnei whare tawhito! Ka timata hei te 9am, ka mutu te kura hei te pouputanga o te rā (12pm).
Wiki Hākinakina 13-18/12/2026	Ko te Wiki Hākinakina mā ngā tamariki wharekura o ngā KKM aho matua o te motu ka tū ki Heretaunga hei te wiki whakamutunga o te tau. He wānanga reo, he wānanga hākinakina, he wānanga whanaungatanga te wiki ra. Ko tā tātou tira ka noho ki TKKM o Te Ara Hou, Ahuriri. Ka piri tonu ki TKKM o Te Rito, Ōtaki, ko Mokorito te ingoa. Ka wehe i te ata o te Rātapu (13/12) kia tae atu ki te pōhiri hei te 2pm. Ka hoki mai i te Rāmere (18/12).
Wehenga Tahi 2027	Ka tino rerekē te tīmatanga o te tau kura 2027 e hoa mā! Karekau pea he akomanga mā tātou nā reira kei te āta whakaaro te kāhui kaiako he aha pea hei mahi mā tātou i te tīmatanga tau. Me he whakaaro o koutou, mauria mai ki te hui whānau hei te wiki e tū mai nei. E tūwhera ana mātou ki ngā whakaaro katoa, ahakoa (pea) te whānui, te whāroa, te whāwaho!

Taunakitanga: Kia whakaaehia te pūrongo nei me ngā taunakitanga kei roto.

Moved:
Seconded:

Rāwiri Wright
Tumuaki